

Nunaqarfinni tulaassuivinnilu tunisassiorfiusuni tunisassiorfiit uninngaannartut namminersortunngorsarneqarsinnaanerat Royal Greenland A/S-imut namminersorumasunut akiusut tunngavigalugit tuniniaanissaq iluaqutissartaqarnersoq Naalakkersuisut Royal Greenland A/S peqatigalugu misissuinissamik peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut ilaasortaq Knud Fleischer, Kattusseqatigiit Partiiat)

Akissuteqaat

(Naalakkersuisut Siulittaasuat)

Siullermeerneqarnera

Aallarniutigalugu Naalakkersuisut sinnerlugit aalajangiiffigisassatut siunnersuummut qujavunga.

Naalakkersuisut suliniutit nunatsinni inuussutissarsiutit ineriartortinneqarnerannut siuarsaataasut iluarisimaarpaat. Pingaartumik namminersorluni suliniutit inuiaqatigiit aningaasaqarnerannut siuariartormik pilersitseqataasinnaasut. Namminersorluni suliniutit nutaamik eqqarsarnermik tunngaveqarsinnaapput aammalu niuernikkut periarfissanik nutaanik pilersitsisinnaallutik. Tamatumani pingaartumik niuerfiit ilaat eqqarsaatigineqarput, tamatumani namminersortumik ingerlatsisut arlallit akornanni unammilleqatigiinnerup akinik unammillerneqarsinnaasunik qulakkeereqataallutik aammalu kiffartuussineq tunisassiallu assigiinngissitaartinneqarnerat niuernermi periarfissanik atorluanaanissamut pisariaqarlutik.

Misissuinissap aallartinneqarnissaa eqqarsaatigalugu Royal Greenland A/S-imut tunitsivinnik tunisassiorfinnilluunniit matoqqasoqarnersoq aalajangiisuussaaq.

Naalakkersuisut aalajangiiffigisassatut siunnersuummi periarfissaaratarsinnaasut misissorniarlugit Royal Greenland A/S-imut attaveqarput. Royal Greenland A/S-imit nalunaarutigineqarpoq Royal Greenland A/S nunaqarfinni tunitsivinnik tunisassiorfinnillu matoqqasunik pigisaqanngitsoq. Nunaqarfinni tunisassiorfiit Royal Greenland A/S-imit pigineqartut najukkani aalisarnermik ingerlatsisinnaasoqarnissaa pillugu tamarmik pisarnertut ingerlanneqarput.

Royal Greenland A/S piffissap ilaani matuneqarsimasunik, tunisassiorfiuteqalersimassagaluarpas ingerlatseqatigiiffimmut pissusissamisuussaaq tamakku tuniniarneqarsinnaanissaat. Tamatumunnga peqqutaavoq tunisassiorfinnik naleqarnerujartortitsisunik pilersitsisuunngitsunik pigisaqarnermik aningaasartuutaassamat. Erseqqissaatigineqassaaq taamatut isummerneq suliffeqarfissuup ingerlataasa qitiusut taakkuluunniit ilaasa pilertortumik namminersortunut tuniniarneqarnissaannik piumasaqarnerunngimmat. Naalakkersuisunilli kissaatigineqartoq tassaalluni suliffeqarfiup aningaasarsiornikkut ingerlanerata patajaannerulernissaa anguniarlugu kiisalu pigisat nalillit qulakkeerumallugit ingerlatsinissaq.

Ukiut arlallit matuma siornatigut Royal Greenland A/S tunisassiorfinnik qulinik KNI A/S-imit pisiaqarpoq. Taakkunannga arfineq-marluk suli Royal Greenland A/S-imit pigineqarput, pingasullu tunineqarsimallutik. Tunisassiorfiit tunineqartut tassaapput Sarfannguani, Itilleq aammalu kingullertut Arsummi. Taamaasilluni assersuutissaqarpoq tunisassiorfinnik Royal Greenland A/S-imit ingerlatsisinnaasunut allanut tunineqarsimasunik.

Apeqqutaatinnagit kikkut tunitsivinnik imaluunniit tunisassiorfinnik piginnittuunersut Namminersorlutik Oqartussanut qitiusumik pingaaruteqarpoq, tamakku pisortanit tapiiffigineqaratik imminut akilersinnaasumik ingerlanneqarsinnaanissaat. Taamaasilluni tunitsivinnut aamma tunisassiorfinnut kiffartuussinissamik isumaqatigiissutit ingerlaavartumik ikiliartuaartinneqarlutik.

Namminersortunngorniarnernut suliniutit Naalackersuisunit iluarisimaarineqaraluartoq Royal Greenland A/S-imi tunitsiviit tunisassiorfiillu matuneqartut annertunerusumik misissuiffigineqarnissaat Naalackersuisut pisariaqarsorinngilaat. Tamatumunnga ilutigitillugu erseqqissarneqassaaq Naalackersuisut piginnittuunerminnut atatillugu ingerlatseqatigiiffiit namminneerlutik malinnaaffigineqarlutilli ingerlanissaat kissaatigimmassuk. Taamaasillutik ingerlatseqatigiiffiit siulersuisuisa aqutsisuisalu ingerlatseqatigiiffiup aqunneqarnera isumagissavaat, tassunga ilanngullugu suna ingerlatseqatigiiffimmut pitsaanerpaanersoq.

Taamaattumik siunnersuutip itigartitsissutigineqarnissaa inassutigineqarpoq.